

18.08.2020թ.

ք. Երևան

**ՀՀ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵԻ
ԻՐԱՎԱԲԱՆԱԿԱՆ ՎԱՐՉՈՒԹՅՈՒՆ
ՈՐՈՇՈՒՄ թիվ 417791/03-Վ
ՎԱՐՉԱԿԱՆ ՎԱՐՈՒՅԹԸ ՎԵՐՍԿՍԵԼՈՒ ԵՎ
ՎԱՐՉԱԿԱՆ ՏՈՒՅԺ ՆՇԱՆԱԿԵԼՈՒ ՎԵՐԱԲԵՐՅԱԼ**

Ես՝ ՀՀ պետական եկամուտների կոմիտեի իրավաբանական վարչության պետ Ա.Մնացականյանս, քննելով վարչական իրավախախտման վերաբերյալ թիվ ~~14887~~ գործը և ուսումնասիրելով վարչական իրավախախտման վերաբերյալ թիվ ~~14887~~ արձանագրությունը և կից նյութերը,

ՊԱՐԶԵՑԻ

Համաձայն ՀՀ պետական եկամուտների կոմիտեի հետաքննության և օպերատիվ հետախուզության վարչության 26.05.2020թ. կազմված թիվ 1508474 արձանագրության «Լէդ Փարթներս» ՍՊԸ-ի (02674805) տնօրեն Արեգ Զրբաշյանը (նույն. քարտ՝ 006961452, ք.Երևան, Սարյան փ. 202. բն.43) խախտել է «ԱՐԺՈՒԹԱՅԻՆ ԿԱՐԳԱՎՈՐՄԱՆ ԵՎ ԱՐԺՈՒԹԱՅԻՆ ՎԵՐԱՀԱՅՈՂՈՒԹՅԱՆ ՄԱՍԻՆ» ՀՀ օրենքի 6-րդ հոդվածի 2-րդ մասով նախատեսված պահանջը, համաձայն որի՝ Հայաստանի Հանրապետության տարածքում ռեզիդենտների միջև ապրանքների (գույքի) իրացման, ծառայությունների մատուցման, աշխատանքների կատարման, գույքի օգտագործման դիմաց փողային վճարումները, ընդունվում են և իրականացվում են Հայաստանի Հանրապետության դրամով:

Նշված արարքի համար նախատեսված է պատասխանատվություն Վարչական իրավախախտումների վերաբերյալ ՀՀ օրենսգրքի 165-րդ հոդվածի 1-ին պարբերությամբ:

Համաձայն Վարչական իրավախախտումների վերաբերյալ ՀՀ օրենսգրքի 165-րդ հոդվածի 1-ին պարբերության՝ Հայաստանի Հանրապետությունում ապրանքների իրացման, աշխատանքների կատարման, ծառայությունների մատուցման փողային գնանշումները, ինչպես նաև այդ գործարքների դիմաց դրամական (փողային) վճարումները Հայաստանի Հանրապետության դրամով իրականացնելու պահանջը չկատարելը առաջացնում է տուգանքի նշանակում խախտման գումարի չափով, բայց ոչ պակաս, քան նվազագույն աշխատավարձի երկուհազարապատիկի չափով:

Փոստային ծառայության միջոցով հետադարձ ծանուցմամբ կողմին ծանուցագիր է ուղարկվել՝ ՀՀ ՊԵԿ իրավաբանական վարչություն ներկայանալու, վարչական իրավախախտման վերաբերյալ գործի քննությանը մասնակցելու վերաբերյալ, սակայն ծանուցագիրը ստանալու փաստը հավաստող ապացույց առկա չի եղել, ուստի ՀՀ ՊԵԿ իրավաբանական վարչության պետի ժամանակավոր պաշտոնակատարի կողմից համաձայն «Վարչարարության հիմունքների և վարչական վարույթի մասին» ՀՀ օրենքի 49-րդ հոդվածի 1-ին մասի «գ» կետի 02.07.2020 թվականին կայացվել է վարչական վարույթը կասեցնելու մասին թիվ 417791/03-կ որոշումը:

Կողմին հայտնաբերելու նպատակով ձեռնարկվել են համապատասխան միջոցներ, որի արդյունքում Արեգ Զրբաշյանը ներկայացել է, սակայն հրաժարվել է մասնակցել արձանագրության կազմմանը և գործի քննությանը, ինչպես նաև չի ներկայացրել գրավոր առարկություն կամ բացատրություն:

Միևնույն ժամանակ վարչական վարույթի նյութերում առկա է <ԼԵԴ ՓԱՐԹՆԵՐՍ> ՍՊԸ-ից ստացված գրություն առ այն, որ «Լէդ Փարթներս» ՍՊ ընկերությունը համաձայն 17.02.2020թ-ին կնքված մատակարարման պայմանագրի, ՀՀ քաղաքացի Նորայր Հովակիմյանից (նույն. քարտ՝ 004938791, տրված 31.07.2014թ-ին 019 կողմից Կոտայքի մարզ, գ. Առինջ 21փ. 9տ.) ձեռք է բերել 110575 հատ բժշկական դիմակ, ընդհանուր արժեքը՝ 2985525 ՀՀ դրամ: Միաժամանակ գրությամբ վերոնշյալ ապրանքների ձեռք բերման դիմաց վճարումը կատարվել է կանխիկ եղանակով՝ ՀՀ դրամով և կից ներկայացվել է «Լէդ Փարթներս» ՍՊԸ-ի թիվ 003 դրամարկղի ելքի օրդերը, մատակարարման պայմանագրի լուսապատճենը և Նորայր Հովակիմյանի 26.02.2020թ-ի հայտարարությունը, որով

վերջինս հայտնել է, որ գործարքի դիմաց գումարը ստացել է ՀՀ դրամով: Ընկերության գրության մեջ նշվել է, որ ինչ վերաբերում է Նորայր Հովակիմյանի կողմից հայտնած տեղեկատվությանը թե ձեռք բերված ապրանքի դիմաց ստացել է 6000 ԱՄՆ դոլլար, ապա նշվել է, որ հնարավոր է պայմանավորվածությունների նախնական փուլում գործարքի գնի մասին գործընկերոջ հետ բանավոր բանակցություններն եղել են և ՀՀ դրամով, և դրան համարժեք արտարժույթով, սակայն մատակարարման պայմանագրով ապրանքի գինը սահմանվել է ՀՀ դրամով և ի կատարումն պայմանագրի 5.1 կետի վճարումը կատարվել է ՀՀ դրամով:

Վերոգրյալի կապակցությամբ հայտնում ենք, որ վարչական վարույթի նյութերում առկա է Նորայր Հովակիմյանի կողմից 06.05.2020թ-ին և 25.05.2020թ-ին ներկայացված գրավոր հայտարարությունները առ այն, որ «Լէդ Փարթենես» ՍՊԸ-ին իրացված դիմակների դիմաց վճարումը ընկերության տնօրեն Արեգ Զրբաշյանի կողմից կատարվել է արտարժույթով՝ վճարվել է 6.000 ԱՄՆ դոլլար: Այսպիսով ձեռք բերված փաստական տվյալների համակցությամբ հիմնավորվում է «Լէդ Փարթենես» ՍՊԸ-ի տնօրեն Արեգ Զրբաշյանի կողմից վարչական իրավախախտում կատարելու փաստը:

Նկատի ունենալով, որ ակտի հասցեատերը ի հայտ է եկել, հաշվի առնելով վերոգրյալը և ղեկավարվելով, Վարչական իրավախախտումների վերաբերյալ ՀՀ օրենսգրքի 32-րդ հոդվածի 2-րդ մասով, 244², 281 հոդվածներով և 282 հոդվածի 1-ին մասի 1-ին կետով, ինչպես նաև «Վարչարարության հիմունքների և վարչական վարույթի մասին» ՀՀ օրենքի 49-րդ հոդվածի 3-րդ մասով՝

ՈՐՈՇԵՑԻ

1. Արեգ Զրբաշյանի վերաբերյալ հարուցված թիվ 14887 վարչական վարույթը վերսկսել:
2. Համաձայն Վարչական իրավախախտումների վերաբերյալ ՀՀ օրենսգրքի 165-րդ հոդվածի 1-ին պարբերության՝ Արեգ Զրբաշյանի նկատմամբ կիրառել վարչական տույժ՝ նշանակել տուգանք 2.985.525 դրամի չափով:

ԻՐԱՎԱԲԱՆԱԿԱՆ ՎԱՐՉՈՒԹՅԱՆ ՊԵՏ



Լ.ՄԻՐՈՍԿԱԿԱՆՅԱՆ

Ծանոթություն. Վարչական իրավախախտումների վերաբերյալ ՀՀ օրենսգրքի հոդված 165-րդ հոդվածի 1-ին պարբերության համար նշանակվել էր վարչական տույժ (հոդված 40) Վարչական իրավախախտման վերաբերյալ գործի որոշման դեմ գանգատ կարող է տրվել որոշումը ստանալուց հետո երեսուն օրվա ընթացքում: Նշված ժամկետը հարգելի պատճառներով բաց թողնելու դեպքում այդ ժամկետը կարող է վերականգնվել գանգատը քննելու համար իրավագործ մարմնի (պաշտոնատար անձի) կողմից, այն անձի դիմումով, որի նկատմամբ ընդունված է որոշումը (հոդված 288) կամ որոշումը կարող է բողոքարկվել ՀՀ վարչական դատարան՝ երկամսյա ժամկետում:

Խախտողի կողմից տուգանքը պետք է վճարվի տուգանք նշանակելու մասին որոշումը նրան հանձնելու օրվանից ոչ ուշ, քան տասնհինգ օրվա ընթացքում, իսկ այդ որոշումը գանգատարկելու կամ բողոքարկելու դեպքում՝ գանգատը կամ բողոքը առանց բավարարման թողնելու մասին ծանուցման օրվանից ոչ ուշ, քան տասնհինգ օրվա ընթացքում (հոդված 305, մաս 1) գանձապետական հետևյալ հաշվեհամարին. 900005240487՝

վճարման անդորրագրի <<նպատակ>> դաշտում պարզադիր նշելով որոշման համարը:

Տուգանքը նշանակելու մասին որոշումն իրավախախտում կատարած անձին հանձնելու օրվանից, իսկ տուգանքը նշանակելու մասին որոշումը բողոքարկելու դեպքում բողոքն առանց բավարարման թողնելուց հետո 15 օրվա ընթացքում տուգանքը չվճարելու դեպքում այն ենթակա է բռնագանձման օրենսդրությամբ սահմանված կարգով:

Մասնակցեցի գործի քննությանը, որոշման վերաբերյալ առարկություններ չունեն